

ফিলিপ্পীয়দের কাছে পত্র

১ আমরা, খ্রীষ্টযীশুর দাস পল ও তিমথি, খ্রীষ্টযীশুতে যে সকল পবিত্রজন ফিলিপ্পিতে আছে, তাদের সমীপে, এবং ধর্মাধ্যক্ষদের ও পরিবেশকদের সমীপে : ২ আমাদের পিতা ঈশ্বর ও প্রভু যীশুখ্রীষ্ট থেকে অনুগ্রহ ও শান্তি তোমাদের উপর বর্ষিত হোক।

ধন্যবাদ-স্তুতি ও প্রার্থনা

৩ তোমাদের কথা স্মরণ করলেই আমি আমার ঈশ্বরকে ধন্যবাদ জানাই, ৪ এবং সবসময় আমার সমস্ত প্রার্থনায় তোমাদের সকলের জন্য মনের আনন্দেই প্রার্থনা করে থাকি ; ৫ কারণ প্রথম দিনগুলি থেকে আজ পর্যন্ত তোমরা সুসমাচার প্রচার-কাজে সহভাগী। ৬ আর এতে আমার দৃঢ় ভরসা আছে, তোমাদের অন্তরে যিনি এই উত্তম কাজ আরম্ভ করেছেন, তিনি যীশুখ্রীষ্টের দিন পর্যন্তই তা সম্পন্ন করে যাবেন। ৭ তোমাদের সকলের সম্বন্ধে আমার তেমন মনোভাব থাকা সমীচীন, কেননা তোমরা আমার হৃদয়ে স্থান পেয়েছ—সেই তোমরা সকলে, যারা আমার শেকলাবদ্ধ অবস্থায় ও সুসমাচারের পক্ষসমর্থনে ও স্থাপনে আমার কাজে আমার অনুগ্রহের সহভাগী হয়েছ। ৮ স্বয়ং ঈশ্বর আমার সাক্ষী যে, খ্রীষ্টযীশুর স্নেহে আমি তোমাদের সকলের প্রতি গভীর আকাঙ্ক্ষা পোষণ করি। ৯ তাই প্রার্থনাও করে থাকি, তোমাদের ভালবাসা যেন জ্ঞানে ও সম্পূর্ণ ধীশক্তিতে উত্তরোত্তর উপচে পড়ে, ১০ যেন তোমরা যা যা উত্তম তা-ই সবসময় নির্ণয় করতে পার এবং খ্রীষ্টের দিন পর্যন্ত নিখুঁত ও অনিন্দ্য হয়ে থাকতে পার, ১১ এবং ধর্মময়তার সেই ফলে পরিপূর্ণ হতে পার, যা ঈশ্বরের গৌরব ও প্রশংসার উদ্দেশে যীশুখ্রীষ্ট দ্বারাই প্রাপ্য।

পলের কারারুদ্ধ অবস্থা ও সুসমাচারের অগ্রগতি

১২ ভাই, তোমাদের আমি একটা কথা জানাতে ইচ্ছা করি : আমার সম্বন্ধে সম্প্রতি যা কিছু ঘটেছে, তা আসলে সুসমাচারের অগ্রগতির পক্ষেই দাঁড়িয়েছে, ১৩ যার ফলে খ্রীষ্টে আমার শেকলাবদ্ধ অবস্থা গোটা শাসক-ভবনের কাছে ও অন্যান্য সকলের কাছে জানা কথা হয়েছে ; ১৪ তাই আমার অধিকাংশ ভাই আমার শেকলের কারণে খ্রীষ্টের প্রতি দৃঢ়প্রত্যয়ী হয়ে নির্ভয়ে ও আরও অধিক সাহসের সঙ্গে ঈশ্বরের বাণী প্রচার করছে। ১৫ এদের মধ্যে অবশ্য কেউ কেউ ঈর্ষা ও রেষারেষির মনোভাবে চালিত হয়েই খ্রীষ্টকে প্রচার করছে, কিন্তু তবু বেশ কয়েকজনও আছে, যারা সৎ মনোভাব নিয়ে করছে। ১৬ এরা ভালবাসার খাতিরে করছে, কেননা জানে, আমি সুসমাচারের পক্ষসমর্থন করতে নিযুক্ত হয়েছি। ১৭ সেই অন্যেরা কিন্তু প্রতিদ্বন্দ্বিতারই খাতিরে খ্রীষ্টকে প্রচার করছে, তাদের মনোভাব বিশুদ্ধ নয়, তারা মনে করছে, আমার শেকলে আরও অধিক দুঃখজ্বালা যোগ করবে। ১৮ কিন্তু তাতে কী? কপটতায় বা সত্যের আশ্রয়ে যে কোন প্রকারেই হোক, আসল কথা হল : খ্রীষ্ট প্রচারিত হচ্ছেন, আর এতেই আমি আনন্দ করছি আর আনন্দ করতে থাকব ; ১৯ কেননা আমি জানি, তোমাদের প্রার্থনা এবং যীশুখ্রীষ্টের আত্মার সহায়তা দ্বারা তা আমার পরিত্রাণের কারণ হয়ে উঠবে। ২০ আমার একান্ত প্রত্যাশা ও ভরসাই যে আমাকে কিছুতেই আশাভ্রষ্ট হতে হবে না, আমি বরং পূর্ণ প্রত্যয়ী যে, সবসময়ের মত এখনও খ্রীষ্ট আমার দেহে মহিমাম্বিত হবেন—তা জীবনে হোক, বা মৃত্যুতে হোক।

২১ কেননা আমার পক্ষে জীবন খ্রীষ্ট, এবং মৃত্যু লাভ। ২২ কিন্তু দেহে জীবন বলতে যদি ফলপ্রসূ হয়ে কাজ করা বোঝায়, তবে কোনটা আমাকে বেছে নেওয়া উচিত, তা জানি না। ২৩ আসলে আমি সেই দুইয়ের মধ্যে সঙ্কুচিত হচ্ছি : একদিকে আমার এই বাসনা যে, বিদায় নিয়ে খ্রীষ্টের সঙ্গে থাকি, ২৪ কারণ এই তো বহুগুণে শ্রেয় ; অপরদিকে দেহে থাকা তোমাদের জন্য আরও বেশি প্রয়োজনীয়। ২৫ আমার পক্ষ থেকে আমি এই বিষয়ে নিশ্চিত আছি যে, আমি থাকব, ও বিশ্বাসে তোমাদের সেই অগ্রগতি ও আনন্দের জন্য তোমাদের সকলের পাশেপাশে দাঁড়াব, ২৬ যেন তোমাদের কাছে আমার এই ফিরে আসার ফলে খ্রীষ্টযীশুতে তোমাদের গর্ব আমার মধ্য দিয়ে অধিক উপচে পড়ে।

বিশ্বাসের জন্য সংগ্রাম

২৭ শুধু একটা কথা, খ্রীষ্টের সুসমাচারের যোগ্য নাগরিকদের মত আচরণ কর ; আমি এসে তোমাদের নিজেই দেখি বা দূরে থেকে তোমাদের বিষয়ে কথা শুনি, আমি যেন জানতে পারি যে তোমরা এক আত্মায় স্থির আছ, এক প্রাণে সুসমাচারের বিশ্বাসের পক্ষে সংগ্রাম করছ, ২৮ এবং কোন কিছুতেই বিরোধীদের ভয় পাছ না। তা ওদের পক্ষে বিনাশের লক্ষণ, তোমাদের পক্ষে কিন্তু পরিত্রাণের প্রমাণ। ২৯ তেমনটি ঈশ্বর থেকেই আসে, কারণ খ্রীষ্টের খাতিরে তোমাদের এই অনুগ্রহ দেওয়া হয়েছে, যেন তাঁর প্রতি কেবল বিশ্বাসই রাখ, তা নয়, কিন্তু তাঁর জন্য দুঃখযন্ত্রণাও ভোগ কর ; ৩০ কেননা তোমরা সেই একই সংগ্রাম বহন করছ যা আমাকে বহন করতে দেখেছ, ও যা বিষয়ে এখনও শুনছ, আমি তা বহন করছি।

একাত্মতা ও বিনম্রতা

২ সুতরাং, খ্রীস্টে যদি কোন প্রেরণা, যদি ভালবাসার কোন সান্ত্বনা, যদি আত্মার কোন সহভাগিতা, যদি কোন স্নেহ ও করুণা থাকে, ২ তবে আমার আনন্দ পূর্ণ কর, অর্থাৎ তোমরা হয়ে ওঠ একমন, একপ্রেম, একপ্রাণ, একচিত্ত। ৩ প্রতিদ্বন্দ্বিতা বা অসার অহঙ্কারের বশে কিছুই করো না; বরং বিনম্রভাবে একে অপরকে নিজের চেয়ে ভাল বলেই মনে কর। ৪ তোমরা প্রত্যেকে নিজের স্বার্থের দিকে নয়, পরের স্বার্থের দিকেই লক্ষ রাখ। ৫ খ্রীস্টবীশুতে যে মনোভাব ছিল, তা তোমাদের অন্তরেও যেন থাকে:

- ৬ অবস্থায় ঈশ্বর হয়েও
তিনি ঈশ্বরের সঙ্গে তাঁর সমতুল্যতাকে
আঁকড়ে ধরার বস্তু মনে করলেন না;
- ৭ বরং দাসের অবস্থা ধারণ করে
ও মানুষের সাদৃশ্য আপন করে
তিনি নিজেকে রিক্ত করলেন;
আকারে প্রকারে মানুষের মত আবির্ভূত হয়ে
- ৮ তিনি মৃত্যু পর্যন্ত,
এমনকি ক্রুশমৃত্যু পর্যন্তই নিজেকে বাধ্য করায়
নিজেকে অবনমিত করলেন।
- ৯ আর এইজন্য ঈশ্বর তাঁকে উন্নীত করলেন,
ও তাঁকে দিলেন সেই নাম,
সকল নামের চেয়ে শ্রেষ্ঠ যে নাম,
- ১০ যেন যীশু-নামে প্রতিটি জানু নত হয়
—স্বর্গে, মর্তে ও পাতালে—
- ১১ এবং পিতা ঈশ্বরের গৌরবে
প্রতিটি জিহ্বা ঘোষণা করে,
‘যীশুখ্রীস্টই প্রভু।’

ভক্তদের কর্তব্য

১২ সুতরাং, হে আমার প্রিয়জনেরা, তোমরা সবসময় যেমন বাধ্য হয়ে আসছ, তেমনি আমি তোমাদের মধ্যে থাকাকালেই তোমরা যেভাবে ছিলে শুধু সেভাবে নয়, বরং এখন আমি যে দূরে আছি আরও বেশিই ক’রে তোমরা সত্যে ও সর্বসম্প্রদেয় তোমাদের পরিদ্রাণের সাধনা করে চল। ১৩ কেননা তিনি নিজেই তোমাদের অন্তরে তাঁর মঙ্গলময় সঙ্কল্প অনুযায়ী ইচ্ছা ও কর্মক্ষমতা কার্যকারী করেন। ১৪ গজগজ না ক’রে, কোন তর্ক না করেই সবকিছু কর ১৫ যেন নিখুঁত ও সরল মানুষ হতে পার; কুটিল ও ভ্রষ্ট এক প্রজন্মের মানুষদের মধ্যে যেন হতে পার ঈশ্বরের অনিন্দনীয় সন্তান; ওদের মধ্যে তোমরা জগতে জ্যোতিষ্কেরই মত উজ্জ্বল আলোতে উদ্ভাসিত হও, ১৬ ওদের সামনে জীবনের বাণী উচ্চ করে ধরে রাখ। তবেই খ্রীস্টের দিনে আমি গর্ব করতে পারব যে, বৃথা দৌড়ইনি, বৃথা পরিশ্রমও করিনি। ১৭ আর যদিও তোমাদের বিশ্বাসের যজ্ঞ ও সেবাকর্মের উপর আমার রক্ত পানীয়-নৈবেদ্য রূপে ঢালতে হয়, তবুও আমি আনন্দিত, আর তোমাদের সকলের সঙ্গে আনন্দ করছি। ১৮ তেমনি তোমরাও আনন্দিত হও, আর আমার সঙ্গে আনন্দ কর।

তিমথি ও এপাফ্রদিতসের কথা

১৯ প্রভু যীশুতে আমার এই প্রত্যাশা আছে, তিমথিকে শীঘ্রই তোমাদের কাছে পাঠাব, যেন তোমাদের খবরাখবর জেনে আমারও প্রাণ জুড়িয়ে যায়। ২০ আসলে, তোমাদের কাছে পাঠানোর মত আমার আর এমন কেউ নেই যার প্রাণ তাঁরই মত, আর যে তাঁর মত সত্যিকারে তোমাদের প্রতি যত্নবান। ২১ কেননা ওরা সকলে নিজ নিজ স্বার্থ নিয়ে ব্যস্ত, যীশুখ্রীস্টের স্বার্থ নিয়ে নয়। ২২ কিন্তু তোমরা তাঁর পক্ষে এই প্রমাণ পেয়েছ যে, পিতার সঙ্গে সন্তান যেমন, সেইমত ইনি আমার সঙ্গে সুসমাচারের সেবা করেছেন। ২৩ সুতরাং আশা করি, আমার অবস্থা-পরিস্থিতি সম্বন্ধে কিছুটা স্পষ্ট দেখতে পাওয়ামাত্র তাঁকে তোমাদের কাছে পাঠিয়ে দেব। ২৪ কিন্তু প্রভুতে আমার দৃঢ় ভরসা এই, আমি নিজেই শীঘ্র এসে উপস্থিত হব।

২৫ আমার ভাই ও আমার কাজের ও সংগ্রামের সঙ্গী এপাফ্রদিতস, যাকে তোমরা আমার সমস্ত প্রয়োজনে সাহায্য করতে পাঠিয়েছিলে, তাঁকে আপাতত তোমাদের কাছে পাঠানো প্রয়োজন মনে করলাম; ২৬ আসলে তোমাদের সকলকে দেখবার তাঁর বড় ইচ্ছা ছিল, এবং তোমরা তাঁর অসুস্থতার কথা শুনেছিলে বলে তিনি চিন্তিত ছিলেন। ২৭ আর বাস্তবিক তিনি অসুস্থ হয়ে প্রায় মরণাপন্ন অবস্থায়ই পড়েছিলেন; কিন্তু ঈশ্বর তাঁর প্রতি দয়া করলেন; তাঁর প্রতি শুধু নয়, আমারও প্রতি দয়া করলেন, পাছে দুঃখের উপর আমার আরও বেশি দুঃখ হয়। ২৮ তাই আমি তাঁকে যথেষ্ট যত্ন সহকারেই পাঠালাম, যেন তোমরা তাঁকে দেখে আবার আনন্দিত হও, আমারও যেন সেদিকে আর কোন

চিন্তা না থাকে। ২৯ তাই তোমরা তাঁকে প্রভুতে সম্পূর্ণ আনন্দের সঙ্গে গ্রহণ করে নাও, এবং তাঁর মত ব্যক্তিদের প্রতি সম্মান দেখাও; ৩০ কারণ খ্রীষ্টের সেবাকর্মের জন্য তিনি প্রায় মরতে বসেছিলেন, কেননা যখন তোমাদের পক্ষে সম্ভব ছিল না, তখন নিজ প্রাণের ঝুঁকি নিয়ে তোমাদের স্থানে তিনিই সেই সেবাকাজের অংশী হলেন।

খ্রীষ্টীয় পরিত্রাণের প্রকৃত পথ

৩ শেষ কথা, হে আমার ভাই, তোমরা প্রভুতে আনন্দে থাক। একই কথা বারবার তোমাদের লিখতে আমি একটুও ক্লান্তি বোধ করছি না, অপরদিকে তাতে তোমাদের উপকার হয়। ২ সেই কুকুরদের সম্বন্ধে সাবধান, সেই দুষ্কর্মীদের সম্বন্ধে সাবধান, সেই ছেদনপত্নীদের সম্বন্ধে সাবধান। ৩ আমরাই তো পরিচ্ছেদিত মানুষ, এই আমরা যারা ঈশ্বরের আত্মা দ্বারা চালিত হয়ে উপাসনা করি, এবং মাংসে আস্থা না রেখেই খ্রীষ্টযীশুতে গর্ব করি, ৪ যদিও আমার পক্ষ থেকে আমি মাংসেও আস্থা রাখতে পারতাম। যদি কেউ মনে করে, সে মাংসে আস্থা রাখতে পারে, তার চেয়ে আমি বেশি করতে পারি। ৫ আমি অষ্টম দিনে পরিচ্ছেদিত, আমি ইস্রায়েল জাতির, বেঞ্জামিন গোষ্ঠীর মানুষ, হিব্রু বংশের হিব্রু সন্তান, আমি বিধান পালনের দিক থেকে ফরিসি, ৬ ধর্মাগ্রহের দিক থেকে মণ্ডলীর নির্ঘাতনকারী, বিধান ভিত্তিক ধর্মময়তার দিক থেকে অনিন্দনীয়! ৭ কিন্তু আমার কাছে যা কিছু ছিল লাভের বিষয়, খ্রীষ্টের খাতিরে আমি তা লোকসান বলে গণ্য করলাম। ৮ এমনকি, আমার প্রভু খ্রীষ্টযীশুকে জানা আমার কাছে এমনই উৎকৃষ্ট বিষয় যে, আমি অন্য সবকিছু লোকসান বলে গণ্য করছি। তাঁরই খাতিরে আমি ওই সবকিছু ছেড়ে দিতে সহ্য করেছি, আবর্জনা বলেই তা গণ্য করছি, খ্রীষ্টকেই যেন লাভ করতে পারি, ৯ ও শেষে তাঁরই মধ্যে একটা স্থান পেতে পারি—কিন্তু আমার নিজের ধর্মময়তার ফলে যা বিধান থেকে আগত, তা নয়, বরং এমন ধর্মময়তার ফলে, যা খ্রীষ্টে বিশ্বাস দ্বারা পাওয়া, বিশ্বাসমূলক সেই ধর্মময়তা যা ঈশ্বরেরই দেওয়া। ১০ ফলে আমি যেন তাঁকে, তাঁর পুনরুত্থানের পরাক্রম ও তাঁর যন্ত্রণাভোগের সহভাগিতা জানতে পারি, এভাবে যেন তাঁর মৃত্যুর সমরূপ হতে পারি, ১১ এই প্রত্যাশায় যে, মৃতদের মধ্য থেকে পুনরুত্থানের নাগাল পেতে পারব। ১২ আমি যে ইতিমধ্যে তেমন পুরস্কার জয় করেছি কিংবা ইতিমধ্যে শেষ লক্ষ্যে পৌঁছেছি, তা নয়; কিন্তু তা জয় করার জন্য দৌড়তে আপ্রাণ চেষ্টা করি, কারণ আমাকেও খ্রীষ্টযীশু দ্বারা জয় করা হয়েছে। ১৩ ভাই, আমি নিজের বেলায় মনে করি না, ইতিমধ্যে তা জয় করেছি; কিন্তু এটুকু জানি, পিছনে যা কিছু আছে সবই ভুলে গিয়ে, সামনে যা রয়েছে তারই চেষ্টায় একাগ্র হয়ে ১৪ লক্ষ্যের দিকে দৌড়তে থাকি যেন খ্রীষ্টযীশুতে ঈশ্বরের সেই স্বর্গীয় আহ্বানের পুরস্কার জয় করতে পারি। ১৫ সুতরাং এসো, আমাদের মধ্যে সিদ্ধপুরুষ যারা, তাদের সকলের যেন এই ধারণা থাকে; আর যদি কোন বিষয়ে তোমাদের অন্য ধারণা থাকে, তবে তোমাদের জন্য ঈশ্বর তাও স্পষ্ট করবেন। ১৬ আপাতত এসো, আমরা যেখানে এসে পৌঁছেছি, সেখান থেকে একই ধারায় চলতে থাকি।

১৭ ভাই, সকলে মিলে তোমরা আমার অনুকারী হও, এবং আমাতে তোমাদের যে আদর্শ আছে, যারা সেইমত চলে, তাদেরই দিকে তোমাদের চোখ নিবদ্ধ রাখ; ১৮ কেননা অনেকে আছে—তাদের বিষয়ে তোমাদের বারবার বলেছি, এখনও চোখের জল ফেলতে ফেলতে বলছি—যারা খ্রীষ্টের ত্রুশের শত্রুর মত চলছে: ১৯ তাদের শেষ পরিণাম কিন্তু বিনাশ, কেননা পেটকেই নিজেদের ঈশ্বর ব'লে মেনে তারা যা তাদের লজ্জা পাবার বিষয় তা-ই নিয়ে গর্ব করে; তারা পার্থিব চিন্তায়ই ব্যস্ত। ২০ কিন্তু আমাদের মাতৃভূমি স্বর্গেই রয়েছে, এবং সেই স্বর্গ থেকেই পরিত্রাতারূপে প্রভু যীশুখ্রীষ্টেরই প্রতীক্ষায় রয়েছে আমরা। ২১ যে পরাক্রম গুণে তিনি সমস্ত কিছুই নিজের বশীভূত করতে পারেন, তিনি সেই পরাক্রম দ্বারাই আমাদের হীনাবস্থার এই দেহটি রূপান্তরিত করে তাঁর আপন গৌরবময় দেহের সমরূপ করবেন।

৪ তাই, হে আমার প্রিয় ভাই যাদের দেখতে আমি একান্ত বাসনা করছি, তোমরাই যে আমার আনন্দ ও আমার মুকুট, তোমরা এইভাবেই প্রভুতে স্থিতমূল থাক।

শেষ বাণী

২ এভোদিয়াকে আবেদন জানাচ্ছি, সিন্তিথেকেও আবেদন জানাচ্ছি, যেন প্রভুতে একমন হয়। ৩ তোমাকেও, হে আমার যথার্থ সহকর্মী, অনুরোধ করছি, এঁদের সাহায্য কর, কারণ এঁরা সুসমাচারের জন্য আমার সঙ্গে সংগ্রাম করেছিলেন, যেমনটি ক্লেমেন্টও এবং আমার আরও আরও সহকর্মীও করেছিলেন, যাদের নাম জীবনগ্রন্থে লেখা আছে।

৪ তোমরা প্রভুতে নিত্য আনন্দেই থাক; আবার বলছি, আনন্দেই থাক। ৫ তোমাদের অমায়িকতা সকল মানুষের কাছে জ্ঞাত হোক। প্রভু তো কাছেই এসে গেছেন। ৬ কোন বিষয়ে চিন্তিত হয়ো না, কিন্তু সমস্ত বিষয়ে প্রার্থনা ও মিনতি দ্বারা ধন্যবাদ-স্তুতি জানিয়ে তোমাদের সকল যাচনা ঈশ্বরের কাছে জানাও। ৭ তবে ঈশ্বরের সেই শান্তি, যা সমস্ত ধারণার অতীত, তোমাদের হৃদয় ও মন খ্রীষ্টযীশুতে রক্ষা করবে।

৮ শেষ কথা, ভাই: যা কিছু সত্য, শ্রদ্ধার যোগ্য, ধর্মসম্মত ও পুণ্যময়, প্রীতিকর, শুভদায়ক, সদগুণমণ্ডিত ও প্রশংসনীয়, তোমরা তারই অনুধ্যান কর। ৯ আমার কাছে যা কিছু শিখেছ, গ্রহণ করেছ, শূন্যে ও দেখেছ, সেই সবই কর; তাহলে শান্তিবিধাতা ঈশ্বর তোমাদের সঙ্গে থাকবেন।

উপহারের জন্য ধন্যবাদ জ্ঞাপন

১০ আমি প্রভুতে গভীর আনন্দ পেলাম, কারণ এত দিনের পর এখন তোমরা আমার প্রতি তোমাদের মনোভাব নতুন উদ্দীপনায় উদ্দীপিত করেছ; তেমন মনোভাব তোমাদের আগেও ছিল বটে, কিন্তু সুযোগটাই তোমরা পাচ্ছিলে না। ১১ আমার কোন অভাবের জন্য একথা বলছি এমন নয়, আমি তো যেই অবস্থায় থাকি না কেন, তাতে সন্তুষ্ট থাকতে শিখেছি: ১২ অভাবও ভোগ করতে শিখেছি, প্রাচুর্যও ভোগ করতে শিখেছি; সবকিছুতে সব দিক দিয়ে আমি দীক্ষিত: তৃপ্তি বা ক্ষুধা, প্রাচুর্য বা অভাব ভোগ করতে আমি দীক্ষিত। ১৩ যিনি আমাকে শক্তি যোগান, তাঁর মধ্যে আমি সবই করতে সক্ষম। ১৪ তবু তোমরা ক্লেশের সহভাগী হওয়ায় ভালই করেছ। ১৫ হে ফিলিপ্পীয়েরা, তোমরা, তোমরাই জান, সুসমাচার প্রচারের প্রথম লগ্নে, যখন আমি মাসিডন ছেড়ে গেছিলাম, তখন কোন মণ্ডলী আয়-ব্যয় সংক্রান্ত ব্যাপারে আমার সঙ্গে যৌথ তহবিল গঠন করেনি, কেবল তোমরাই করেছিলে। ১৬ থেসালোনিকিতেও তোমরা একবার নয়, দু'বার আমার প্রয়োজনীয় যা-কিছু পাঠিয়েছিলে। ১৭ তোমাদের দান যে আমার চেষ্টার লক্ষ্য তা নয়; আমার চেষ্টা হল সেই ফল, যা তোমাদেরই পক্ষে লাভজনক হবে। ১৮ যা প্রয়োজন, আমার সবই আছে, এমনকি বেশিই আছে; আমি তোমাদের কাছ থেকে এপাফ্রদিতসের মাধ্যমে যা যা পেয়েছি, তাতে আমার চাহিদা পরিপূর্ণ হয়েছে: সেই দান যেন এক সৌরভ, ঈশ্বরের গ্রহণীয় এক প্রীতিকর যজ্ঞবলি। ১৯ আর আমার ঈশ্বরের বদান্যতা দেখিয়ে খ্রীষ্টযীশুতে তাঁর ঈশ্বর্য অনুসারে তোমাদের সমস্ত প্রয়োজন পূরণ করবেন। ২০ আমাদের পিতা ঈশ্বরের গৌরব হোক চিরদিন চিরকাল। আমেন!

প্রীতি-শুভেচ্ছা ও আশীর্বাদ

২১ তোমরা খ্রীষ্টযীশুতে প্রত্যেক পবিত্রজনকে প্রীতি-শুভেচ্ছা জানাও। যে সকল ভাই আমার সঙ্গে রয়েছেন, তাঁরা তোমাদের প্রীতি-শুভেচ্ছা জানাচ্ছেন। ২২ সকল পবিত্রজন, বিশেষভাবে যঁারা সীজারের বাড়ির লোকজন, তাঁরা তোমাদের প্রীতি-শুভেচ্ছা জানাচ্ছেন।

২৩ প্রভু যীশুখ্রীষ্টের অনুগ্রহ তোমাদের আত্মার সঙ্গে থাকুক।